


Kitab kârifi ta



Livre de la saison des pluies

Kitab kârifi ta

Kanaa mbo suraŋ mbo nîndinjara gi:

Mahamat Ibrahim Adam

SIL Tchad

Hadjer Hadid

2021

Langue: massalit, parlée dans la préfecture d'Assoungha à l'est du Tchad, et au Soudan, surtout dans l'Etat fédéral du Darfour occidental.

Titre en français: Livre de la saison des pluies

Genre: Culturel

Kanaa nîndijara gi (Auteur) :

Mahamat Ibrahim Adam

Kanaa norgola wî (Rédacteurs) :

Juma Ibrahim Harun, Abderazik Mahamat Ahmat, Ishak
Kamis Mahamat, Gamaraddin Mahamat Harun,
Abdelmajid Abdalla Sileman

Suran nena wî (Illustrations) :

Mahamat Ibrahim Adam (p. 1-25), SIL International
Illustrations / Adam Dawud Hissen (p. 26)

© 2019, 2021 SIL Tchad, B.P. 4214, N'Djaména, Tchad

2ème édition: 200 exemplaires

Kanaa

Assu riya mbo âte mbo.....	4
Kanaa ndâŋa.....	5
Lirna sa tanj.....	6
Kanaa bokona.....	7
Madaldi saa tanara.....	8
Kanaa bokona.....	10
Âsurtu gokora.....	12
Kanaa bokona.....	13
Âsurtu goya.....	14
Kanaa bokona.....	17
Malta suro nîŋgeya.....	18
Kanaa bokona.....	20
So kûllan̄ saa laŋa.....	22
Kanaa bokona.....	23
Guro gîkeya.....	24
Jariya kimiŋ nîŋa kârifim.....	25
Kanaa bokona.....	26
Nêtin̄ kârifi tanja.....	27

Assu riya mbo âte mbo

Ambuñana wî mbo

Lîyarce mbo lôsi mbo

Âfandin̄ mbo majirinta mbo

Kaa kanaa masarakawo nojone mbo

Awun ambige wî mbo

Kooy âte ñû-kodo assu ârnija

Saa laje

Kanaa ndâŋa

Kitab gim gâyiriya kaa Masaraa nîŋ kârifim wâyiri
wîwo lukkurdim kûde ŋagara wî yoŋ rakti.

Gâyiriya kitab gim kûde raktiňa: Kanaa sa
taŋa mbo madaldi taŋa mbo hâgudu âsurtu gokora
mbo goya mbo lukkuraŋ mo kûde rakti.

Hâgudu kanaa guro taŋa mbo sâsi kûllaŋ saa
laŋa mbo ila koy baka rakti. Lukkura tuum du
kanaa suro taŋa mbo jariya kimin kârifim isari ila
koy rakti. Hâgudu ŋêtiŋ kârifi taŋa koy ândayjara
ilawo katab ana, yagun âniŋana indan du ûjim
minda-ken awun mîrarnin rok anti.

Hâgudu lukkurdiŋ nîŋ âsuroŋ ila mbo kanaa
bokona mbo awun ambenin, kanaa ŋundi rakan
gosin̊ki. Kanaa masarakawo kallo nidil gâr ge-kede
kâddur ŋunan îniŋasari. In ken kaa alle kârifim
wâyirinniŋ lukkura baka ândijara gâr gena kosin̊.
Ba kosinniyandu lasira kanda tûti.

- Mahamat Ibrahim Adam


Lirna sa taŋ

Lêle tu hillem kaa sêy inda gu kârifi tûgiyen, âbiyar dole dâl-dâl ken hâwwakko nunduraŋ taren, âguri du bîrbîrtiyo tanara, kaa hille taŋa celcelo-celcelo de hâbutuu sa turcanan tandaŋantiŋa wîwo taŋ mo wandaya.

Sa kar kosi kâddusar de likkina ndâŋin, sîm-sîm geya mbo reŋe-reŋek geya mbo le kâddu câww! in tara-kunuŋ, lirna ndâŋin kiyeje koy turasiren, kimiŋ ndero unen **masalŋgi** du nîyembo wâlak ke tânarŋirenen, kimiŋ sa wâlak ke-kodo nîyembo tûri rînaŋ dûsuŋ ûrsaŋa.

Kaa hille taŋa ñgo ire, “Sa âmin âbiyar ken lîm-lîma koy tigen, hâgudu subbo **ñûlo** koy kûmacim tigen sîkal mela gu, ñerem tûka âbiyar tîran sa kû kar lirnaŋ ñun subbo loyo tena.”

Sa lirnaŋ taka, kaa hille taŋa ïŋara gu masalŋgi sîŋgee kâddusar mbara nondonjon le taka, ajab rînaŋ ela.



Kimiñ du tîñjar siramim saa tadariña ilam isarin,
kimiñ tuu du âbi sîlla ilam tañ-tañireta ke isarisina.

Kanaa bokona

Masalŋgi : Masalŋgi ira gi ti ganii mbara ye. Tu njori nomoñe mâri nene giye. Tu gi du sa tirne-ken nârñiro wâlak ke sîŋgee nondoñe giye.

Ñûlo : Ñûlo ira wî i âbiyar dîsir-dîsira lûyy! ke niye so nirnenda ila wî ye.

Madaldi saa tanara

Hille mbo munje madaldi tinden, kimiñ sûr borom
ñuñ sari inda gu, sa ñelle lirnañ tela, sî inde noj de
gelmendi saa nî tukuñura, sîkalu kâriñ oyora.

Madaldi saa kâddur tanara kusul sero inda gu,
saa madaldi taña kâddur kû, **tûku-tûku** ûnjukurumen
kuran le dûmmo lânu, **tûne** têneri ilam sîngée
kâddusar âdumar nûka ilawo ndosiran ula.


Saa madaldi taña du nîyembo kâddur wara
iraran koy wanara, tîran juru ndâñin, **ullari** ke
ôrisiren kimiñ kuran le hillem waka.

Îun subbo madaldim wara, **cel-cela** baka
inden, kimiñ tuu binije uken, tuu **kûdom** ko sûr
îdiringen, tuu du cel-cela kamim **tûkuñnjurumta**
kârambo isarin, tuu du ganii **lewe-leweti** tena ila
wo lacu sero boko sarin-kodo, ida taña kamim ko so
koroo mbo de kûllan, saa ñûtan **njumun** wañana.

Bûrii ganii **sâsi gûren** nene ila nîyembo lewe-
lewetu enen, îya ru ñelle bûrtu udaña, kaa iliwiye.

Nerem kimiñ nîj dâsi idam kar kimiñ kûdom
nîdiringe ilawo, “**Mîdiranje** kûndulti yori! **Îbota**

maci ru kindani, **bû kaŋanti!**" irnen, kimiŋ oyora
dâsi ïniŋa mbo gê hillem waka.



Kanaa bokona

Tûki-tûki : Tûki-tûki ira gi ti madaldi taŋ kâciŋ ye.

Tuŋe : Tuŋe wî ŋâwute kaliŋaa mbo sîŋgee mbo
madaldi saa tanaran, kamim nêrenji ilaye.

Irara : Irara ti certiye lo ida ta kura ye, sa tirne-ken
saa wo kul naŋ idam noyke giye.

Ullar : Ullar wî saa iye-ken saa i de, dole yon sûr
tûkuŋnjurumta ke suri niye ilawo ullari
uriye.

Cel-cela : Cel-cela du saa kâddur na wî waranjin,
saa baka rênj-kodo niye ila cel-cela uriye.

Kûdo : Kûdo gi saa tîran ninda madaldi taŋ kamim
yoŋ, madaldi ta kûri moyoŋ, saa kûrurn
tîran, niyenda lo ninda ilawo kûdo uriye.

Tûkuŋnjurumta : Tûkuŋnjurumta i cel-cela iye-ken,
kamim boro sono-sono tenjekete ilu,
tûkuŋnjurumta uriye.

Lewe-leweti : Gani saa kâriŋ walfinin boko bilic-
bilica ru isirjan naci ilu lewe-leweti uriye.

Njuma : Njuma ira gi saa mâmun kede sun wanje
ilu, njuma taŋe uriye.

Sa gûre : Sa gûre gi ti sa guri giye.

Mîdirangi : Mîdirangi ti hâbuto kûdom nîndinasi lo kûdom nayawo bû ndajan tulusi. Yagu ti kogi mbo nîjirindaye, hâbutoor tûkasi ira kâddur ye.

Îbo : Îbo ira-ken ndû mbo kûjo mbo kooy de sam kûde lay dînjaraye.

Bû laña : Bû laña gi saa ñoñ-kede laña, durmi dol yoñ kana dol yoñ ilu, bû laña uriye.


Âbusugo : Âbusugo ira wî madaldi saa tanara koy saa nîñ uyom jîsa niyeye.

Lômbo : Lômbo ira gi ti wardi madaldi nar, tune mbo gê jîr! ken tilisigiye.

Âsurtu gokora

Sene tu Lîmata kimiñ taŋ mbo âsurtu **okokoren** waka, Lîmata **diyarko** gîlaŋ kokol-kodo, âsurti kâddi gim waka.

Waka-kunuŋ, kimiñ taja mbo âsurtim râcan tuu **gundaldi** mbo **bûra** mbo okokoren, tuu du **fârawi** mbo **kase** mbo sîŋgee ɳetetta ninda ilawo okokoren, kimiñ sona wî du tuu sîŋgee eterena boko



mûgula ilawo ciŋge naŋ saŋgo waŋabaken, tuu du gemberi kîr ige-de, duro âyŋge unŋa tûka.

Âsurom ŋuŋ jatko ŋan nunar, gani boko kîrima tûka kurnaŋ, boko okokola, ŋeremko Lîma kaŋo tula, kimin̄ taŋa du mâmunta tuu nûnju-kodo, tuu lerim ula hillem wâlandira.

Kanaa bokona

Gokora : Gokora gi âsurtu oyoŋtiyan, ko gani âsurti oyoŋte-gim sîŋgee yan ŋâwute tuu yoŋ ninda ila rogora ye.

Ndokokora : Ndokokora gi sîŋge taŋ firawo ketel orgosiregiye.

Diyar : Diyar gi ti âsurti hille mbo munje nindayen malta koy sefim naŋu enenise ilu âsurti diyar uriye.

Gundaldi : Gundaldi gi ti gani âsurtu tâŋgit oyoŋkede, sîŋgee yan âsurtu ŋundu udaŋa giye.

Bûra : Bûra tiro **tondobø** koy uriye, ti gani âsurtu tebet oyeye, yagu abejeg oyoŋnden, inde nuguya ilu bûra uriye.

Fârawi : Fârawi gi ti gani boko ñgûrumi nûka lo
âsurtu koy oyojan nûkasiye.

Kase : Kase ira-ken gani âsurtu ige gi lo boko tîndili
lo sawaye, âbi ta du boko lobokaye.

Âsurtu goya


Kârifi tuka, Koltom ta kañgi ta mbo âsurtu
moyoñki ru tîñjar, dombot-dombot geya wândañina.
Leru nar caki tu dollo keñkeña mbo **torboña** mbo
mukurata mbo sile mbo nucun, caki tu dollo
njoñona mbo saa jarkanam wanantiña mbo
unucuna.

Koltom du **jatko** tûnja âsurtim waka, Koltom
ta kañgi dîru mukuratko kucuñ filalko filta mbo
kûkurumta baka mbo ûsee mbo asee mbo kasem
toyona.

Kîmin ïniña du filta mukurat mbo oyoña ilam,
asee kâcamuu **sorta** tîñ aniña koy caki dollo
wanarcana, hâgudu gonja mbo âñkolikta mbo
baka-baka wanarcana.

Koltom ti tûsuren, kimiñ taña du ïndisen, asee soror mbo kâcamuu mbo ndîsañ, hâgudu gani wardu sono nene gim alinjii ndîsañ-kodo birinjalta ndûnun waraŋko kasem arken oyoña.

Âsurti kâddi gi mbo diyar mbo ndîsañ ñerem le wâlandira. Ijun subbo ɻanja tonjona gim mariyaa mbo âŋkolikta mbo ababatta mbo ïndisaña.



Joo ɳgarna yoŋ uŋuna-kunuŋ târii nîyembo
âsurtim tîŋar kâddi tûka, Koltomta âsurtim târii
murko moyoŋi ru waka.

Koltom ti sile mbo ullari tiren, kima ta du
tonoken, kimiŋ tuu wî du filtawo jirayta mbo
janjab igen kus wâlandira.

Subuŋ mbara yoŋ ɻun âsurtim waka gu, filta
mbo anijaa mbo buraga ena, arken **calta** ôdona,
alinjii koy amboran ken, bakakara ena ɻoŋin hillem
wâlandira.

Joo mbîr noŋ ɻun âsurtim waka gu, filta
ômir-kunuŋ kôk laŋa tândanjina, kûren mbo miŋ
mbo seden tuu mbo ɻeya wândanjina. Arko du
aseem tara kucice du kâddur aseem ɻugusa
wândanjina. In ken hille molok kar âsurtim ɻunjeya
ndâŋin, filta ôma ludaŋ **jûrumta** ena uburuŋa
nditaŋ asee du tiban domam mbo nîgesin atokam
loynu-kodo waraŋ ko rofol kul hillem wara.

Kanaa bokona

Torboña : Torboña gi ti kenkena mbo nûne lo kodo,
ti nusuna lo belle mbo nûneye, hâgudu
tiro mbo ganu ûsureye.

Jat : Jat ti ñeti gani ndoñoriya tam nañ inegiye.

Sorta : Sorta wî i âsurtu mukurat mbo koyoñ-kodo,
gani oyoña ilim dole asee ular ilam ñelle-
ñelle ïndise ilawo asee sorta uriye.

Wanarcana : Wanarcana ira-ken âsurtu gîlañ ko
koyoñ-kodo, gani oyoña ilim kûde asee
yoñ aniñaa yoñ ûsuranç-kede de
wanarcawe ilawo wanarcana uriye.

Mur : Mur ira-ken ti târii gîlañ na âsurtim tîñarin
oye giye.

Calta : Calta ira-ken arken kimiñ dabe tuduna ila
yoñ gonja kimiñ yoñ ilawo calta uriye.

Jûrum : Jûrum ira gi fîlta ludañ gani tîlem toron
ela ilawo jûrum uriye.

Malta suro nîŋgeya

Lêle tu Nitik mbo Kunji mbo suro wateyen
inda gu, Nitik nî sî subbo elelej de njâkal **sâŋakar**
tuŋana, **njuko** njiŋo inda gu Kunji du jî bororo de
taŋa kul, Nitik nîm maŋanni ru tanara, Nitik ta da
du njunjuko ken tîndinjara iŋana.

Ili molo jî jumma gagam loynu jatko ken kul
watiŋa nîŋ bûri ke inda gu, lîyar ïni sona gi malta
dâwiye molo kul tanara.

I du kul suro sîr endena. Yagu lêle ilu subbo
gani **mûrgu** tenarre. Târii koy **caca** nîyembo enen,
malta kallo iŋana kul suro waka. Waka-kunuŋ,
malta wo hâwus mo loyn, tuu du kuma kanaŋ hûy
ken, âsurum layu âlilikò kucuŋ sari lîllike sî indena,
Nitik du arkoo fok ke, laŋ kimiŋ sogoyam ne
tîndinjen, Kunji du wallu kul loso, zârdig mbo kucice
cumo, aŋederi koy sîŋgem tîkalan ndito kulusu,
medegeŋ kofforo laŋo ŋelle taka.


Nitik du idam sûr **âŋunjututin** mbo sisi mbo
kâŋimen mbo ŋoroo mbo miŋanteye ru kul hâgudu
gûndo nejeb mbo ililiŋ mbo kul **ŋufo** anteye ru
toyora.

Waldama ïni raye tu du kuma molo nûsurgi lo koboyñaa mbo kâburko mbo kurcaa mbo kul tanara.

Nitik du arkoo kîbisin sirikam rasiñ tanara, kûmman njijan numaño usa.

Gani kîrima tûka, Nitik kurnañ mbâmbi mbo lâti mbo kûllanç kul kâdançangari mbo bôroo mbo kul tanara injiñana.

Sî indena, raye tu gi “Ama gani âyna ilim ju timira âkala aye âwullañi” ru taka, Nitik ta du tûki-tûkim ko fôfoyot ke boko sarin-kodo kûdom sûr



boko tîringan âwuy-âwuyota ke sarisin nûndurar le
yor waldama ïnim waka.

Waka gu, waldama ïni charaka mbo ɳîri mbo
ken kucice rôciŋ-kodo, âsurom ɳun leru garanju
ken sari tindede warka, taŋ-taŋireta ke boko sarin
jatta ïniŋa ɳan, maltawo kooy ɳgây hille kanaŋ kul
sîr nenden, bûrtu nîbin wayi noŋ, dâkalwo aran ke
ɳugusu hille mbo munje wara-kunuŋ, maltawo
erdim nusul, rayen tuu kâddur mbo tîran **wâydo**
sayidta boko sarin le hillem sîr ena.

Ñitik nî de tuŋana, jâwi Kunji nî gi koy
tuŋana, kufun kul ɳono hillem wara.

Kanaa bokona

Sâŋakar : Sâŋakar ira-ken kimiŋ mbara lêle tîlo da
tîle molo nûŋana ilawo sâŋakar uriye.

Njuka : Njuka gi ti mal lêle tuŋana gim, jî taŋa
kikan wasim onin, jî tîran njuŋja nira ūken
njûr injinjeye.

Dâwiyo : Dâwiyo ira-ken malta eleleñ de kul hille
molo boko sule wanañ-ken, caca boko
wañjanin waladirin-kodo, raye kul suro
tîkegiye.

Mûrgi : Mûrgi ti gani subbo eleleñ de ûrinjii noñ
kûmaciam dole ray-ray in tinde-ken, âmin
gani mûrgi tena uriye.

Caca : Caca uri wî subbo eleleñ de târii saa enenise
ilawo caca uriye.

Âñunçgututi : Âñunçgututi ira-ken buraga sînge kunji
taña ñûrun iñä ilu âñunçgututi uriye.

Nûfo : Nûfo gi sînge ilili taña ñin rayni nar tûn, jî sî
taña yoñ jâwi taña yoñ ikana ilawo nar
loynu nûgurtan iñä ilu ñufo uriye.


Wâydo sayid : Wâydo sayid ira gi tiro kumo koro
kûri mbo racu, koro kû mbo kafan-kodo rac,
koro kûri do îbiye.

So kûllan̄ saa lañā

Subbo elelej de kaa hille tañ malta saa mandanjan ru madaldim ûsura.

Ûsura-kunuñ sâsi tuu **jamko** ken uñjuna, tuu du **mirmiro** waynda ila jamko kâddu ken, tuu wârambana. Rayije maltawo sa kana molo ñelle sû baka-baka keño enjeben, sâsim sûr nandañe wî du **teberek** mo saa âturun mbo kâmbut mbo oyken malta wañana.

Kaa tuu du saa jarkanañ mo loyn sa kana molo ñelle kû binije uken, tuu sâsi saa sâlni baka



nenem ko sûr **endelten**, sâsi tuu du nîyembo ûrten,
kito gûñugusim loyn-kodo, kôdokasim koy loyn
nûgultañ ken, sâgii ken ûnja. Tuu du ndêkereciñ-
kodo tariñ ulin, kimin ïniña du leker mo tâkkastam
gûñugusi nduñ ulin, hillem wâlasi.

Bûgulan du dîrijewo gagan ndañan, nîl borom
hâyyakko ke boko sarin le hillem wâlasire.

Kanaa bokona

Jam : Jam gi saa sam kûde kûrtanjir tîran ninda wî
ye.

Mirmira : Mirmira gi ti muturakta mbo gemberi
mbo so kûllaj irmirake giye.

Teberek : Teberek gi ti sam munje ganu kûrur ken
wardi mbo onorcoñin tuburuñin, saa oyni-ken
malta saa wañe giye.

Ndelta : Ndelta gi ti sa saa tônodin rûse-rûse ite gi
yaka ndelta uriye.


Nûgulta : Nûgulta ira gi ti kodokam saa loyn bita
sina mbo kîbilik ena gi yaka nûgulta uriye.

Guro gîkeya

Kaa kambas hille taŋ lêle tu 11 tîran guro mati ru rugul waram waka. Bûgulanq tuu bêllesi mbo jôkasi mbo ula, kaa kâddusar wî du ɳorii mbo nimanq mbo kul sîr ena. Înjar dûmmo ûrcuŋa bellesi kortoŋ ȫja.

Wayi gu târiim kûde ȫgâri yoŋ timirin, kaŋgi tu “Hay! Kômotko arka” tîrnaŋa, kaa bêllesi mbo ɳorii mbo uluna, sedenq tuu tîŋjar wâriŋa. Kaa tuu laŋ mbo maamaŋ mbo cuman yan, korocanq layu ula.

Tuu du nîyembo nâriŋa ilawo înjarwo ca!
ena, narku ȫbina. Kaa maamaŋ ȫgarna yoŋ luy



korocan lay ula, tuu lan mbo kûraje mbo ula hillem wâlandira.

Jariya kimiñ nîja kârifim

Kârifi tûka sa kar lirnañ taranja, kimiñ hille taña bûrtim tîran, jariya ndâñin âbii sîlla mbo tañ-tañireta ke isarin, kimiñ tuu du **jer-jerta** ke isarin, tuu du âwuy-âwuyo ke isari-de duro ây়ge unna tûka, ânjurom lay ɳuɳu **leri garanġu** kimiñ tuu ken isarin, tuu du **guluɳta** ken isarin, tuu du **zîw-zîwta** ken isarin, tuu du wardi mbo seden kîme isarin, tuu du âliliketa ke isarin usa.

Kusañ tûka, aye jîsa mbo siramim tîran lukkuru ajajat mbo dimiñ-dimiñareta mbo ke isarin, tuu du âwuy-âwuyeta ke isarin, kimiñ boko kâddusar wî fartim tîj âdorsolko racico isarin, tuu nîyembo sona ila du ndilam-ndilamta sari boko sêyn gani nîyembo kusañ tûka le wârcana.

Kanaa bokona

Jer-jer : Jer-jer ira gi ti jariya ililiba mbara tekeniŋ as sû, âbii ganim mo toron, sîngee kalinjaa nûka sona nderen, ililiba ilawo jer-jer ke isari giye.

Leri garanji : Leri garanji ti âñii leri taŋ nuburuŋa as nar, ârcii buri sîmbirkiŋ nene mbara nar, gudo-gudo koch, ganim mo sîŋgo ndil, ilim dole rekeceŋ rayo isari giye.

Guluŋ : Guluŋ ti jariya ganim mo âguu sona âday kûllaŋ kûmaci sinawo luwu isari giye.

Zîw-zîw : Zîw-zîw ti jarkana yoŋ kodoka nârmina yoŋ nar, mbeleto nûko kefel ɲurim âguu mbara lejen, sugurtu rukan dûtoo toron ndibil, gudo-gudo kîbin, wirak ken sûlo ɲû ciŋge isari giye.

Nêtin kârifi taŋa

Kala Sâmirata kârifi tûka kimiŋ taŋa mbo gikawa taŋ tiro mbo laŋ-laŋ ninda ila mbo âsurum maye ru îŋa.

Âsurum waka-kunuŋ, kimiŋ sona wî “ŋariŋo minditaŋa manara su mûranni” ru inditen waka.

Kima kala Sâmira ta gi du jâgiyem lay basalta koyee mbo birinjalta mbo aŋgaleta mbo bumbayta mbo nditaŋ kul tara.

Kala Sâmira du filal mo tindirniyen tare noŋ, micicildi mbo gonja aŋgaleta mbo hâgudu caltaa mbara yoŋ nditaŋ kul kûkurumta baka mbo fîlta mbo ludan Kul tara.

Toron ŋêsin âsurtu boko koyoŋ eleleŋ de hillem wâlandira. Kimiŋ ŋanjam lay âŋkolikta mbo gember mariyaa kirima ila mbo neteŋ minjiŋjanti ru îndijara.

Kala Sâmira ta tîyar taŋ kimiŋ wara-kunuŋ i koy ŋanjam lay, mariyaa mbo ababatta mbo ûsee mbo ndîŋar kon miŋanteye ru kul waka. Kala Sâmira du kimiŋ taŋawo “Kidirŋilo mba nditaji su

âran” tirnen, kimiñ nda indite noj amiña mbo rûsuge mbo nditanj wanara.

Kala Sâmira nîyembo ñoñin, “Hay kimiñ, dîman kalla mbo de muñunan, jâgiyem maka juwafa mbo lâmunta mbo kulin, ama du moñgeta awulin, marni!” tîrnaja, haywa ïrnaja ela.

